



MERIDIAN JUNIOR COLLEGE
JC2 Preliminary Examination
Higher 2

Malay Language and Literature

9559/1

Paper 1 (Part 2)

15 Sep 2015

3 Hours

(Total time for Part 1 and Part 2)

Additional Materials: Writing Papers

ARAHAN UNTUK CALON

- 1 Baca arahan yang diberikan dengan teliti. Kemudian, jawab soalan seperti yang diarahkan.
- 2 Tulis jawapan kamu di dalam Kertas Jawapan yang disediakan.

Kertas soalan ini mengandungi 7 halaman bercetak.

This document consists of **7** printed pages.

ARAHAN : Jawab SEMUA soalan.

BAHAGIAN A (5 markah)

Arahan : Dalam petikan di bawah ini terdapat 5 tempat kosong. Isi tempat kosong tersebut dengan perkataan yang sesuai mengikut konteks petikan. Tulis jawapan kamu mengikut susunan perkataan dalam petikan.

Kalah menang ialah adat pertandingan. Kalau menang, jangan terlalu ghairah sehingga lupa diri; jika tewas, kita harus akur dengan berlapang dada. Begitulah yang patut diamalkan oleh setiap penyokong _____(1)_____ mana-mana pasukan, khususnya penyokong bola sepak. Semangat kesukanan sememangnya wajar _____(2)_____ dalam jiwa kerana memberikan suntikan inspirasi kepada pasukan pilihan. Sokongan _____(3)_____ kepada pasukan kesayangan penting kerana dapat _____(4)_____ semangat kenegaraan dan kelab. Sewajarnya, penonton bijak mengawal _____(5)_____ dan kelakuan ketika menonton di stadium supaya pergaduhan dan kerosakan harta benda dapat dielakkan.

BAHAGIAN B (30 markah)

Arahan : Baca petikan karangan di bawah ini dengan teliti. Kemudian, jawab soalan yang mengikutinya.

PERTARUNGAN MEDIA SOSIAL

Oleh Mior Kamarul Shahid

Hakikat bahawa media sosial menjadi fenomena yang tidak boleh ditangkis lagi di dunia tanpa sempadan ini diterima sudah oleh semua pihak kerana sudah menjadi revolusi dalam dunia komunikasi walaupun kita menyedari kesan baik dan buruknya. Revolusi teknologi komunikasi yang canggih mempertingkatkan dan mempercepatkan lagi penggunaan media sosial. Melalui telefon pintar yang dimiliki kebanyakan orang, khususnya remaja, semua maklumat yang diperlukan berada di hujung jari. Ilmu yang paling besar diberikan oleh media sosial adalah mengajar manusia bersikap terbuka disebabkan penyebaran maklumat tanpa batasan.

Antara peranan utama media termasuklah memberikan maklumat, sama ada dalam bentuk berita ataupun pendapat secara objektif atau subjektif. Lazimnya, syarikat media cetak atau elektronik hanya menyiarkan maklumat terpilih yang mahu disampaikan oleh mereka. Penapisan maklumat boleh menyebabkan keadaan masyarakat **kabur** maklumat lalu mereka mudah percaya sebarang maklumat yang diterima walaupun daripada saluran tidak rasmi. Jika media arus perdana tidak dapat memenuhi cita rasa pengguna media, sudah tentu mereka menjadikan media sosial sebagai saluran alternatif. Kegagalan peranan media arus perdana dalam hal ini diisi oleh media sosial kerana pengguna tidak puas hati dengan fungsi media arus perdana. Mereka lari kepada media sosial, termasuk portal berita dan blog yang diyakini boleh memberi mereka maklumat.

Peranan media sebagai forum pula sudah menjadi begitu popular dalam media sosial. Biasanya, media arus perdana menyediakan ruangan tertentu untuk rakyat meluahkan semua pendapat, termasuklah ruangan “Surat” atau “Forum”. Namun, keterbatasan ruang dan proses penyuntingan rapi seringkali menyebabkan pandangan mereka tidak tersiar. Pandangan yang dianggap bertentangan dengan dasar pemerintah atau maklumat yang dianggap sensitif langsung tidak disiarkan. Dalam hal ini media sosial memberi pengguna kebebasan meluahkan pandangan sepuas hati di ruangan interaktif yang disediakan oleh pengamal media sosial, sama ada facebook, whatsapp, twitter, instagram, blog ataupun portal berita.

Fungsi sebagai pemerhati, sama ada kepada pihak berkuasa ataupun masyarakat, digunakan sepenuhnya oleh media sosial. Sebarang kelemahan yang diketahui atau dilihat akan dijadikan bahan untuk dipaparkan dalam media sosial. Dalam keadaan tertentu, isu yang disiarkan menjadi isu besar, malah boleh menggugat kestabilan politik dan ketenteraman awam. Hal ini boleh **mengundang** risiko kepada mereka. Bagi media arus perdana, mereka tidak boleh menyiarkan sebarang berita pendedahan mengenai pihak berkuasa atau pentadbiran pemerintah tanpa maklumat yang sah daripada sumber yang berwibawa. Media arus perdana mengamalkan etika tertentu manakala dalam media sosial, soal etika tidak begitu diberi perhatian. Setiap pengamal media sosial berebut-rebut mahu menyiarkan maklumat yang eksklusif, khususnya yang sensasi untuk menarik perhatian umum. Kebanyakan media arus perdana pula mengamalkan prinsip bertanggungjawab terhadap pihak berkuasa dan masyarakat.

Bagi sesetengah pengamal media sosial, mereka juga mengamalkan sikap bertanggungjawab dengan membuat pendedahan terhadap pihak berkuasa supaya mengambil tindakan membaiki keadaan. Mereka juga menganggap mereka bertanggungjawab memaklumkan sesuatu terhadap kelemahan atau penyelewengan dalam sesebuah jabatan, agensi atau kementerian.

Berasaskan fungsi utama media, amat sukar untuk mengatakan media sosial **tergelincir** daripada melaksanakan tanggungjawabnya. Terpulanglah kepada pengguna untuk membuat pemilihan yang bijak bagi menentukan saluran maklumat yang berguna untuk mereka. Cara paling berkesan adalah dengan menggunakan kedua-dua media arus perdana dan media sosial dengan sebaik-baik mungkin dan membuat penilaian paling rasional.

Arahan : Berdasarkan petikan karangan di halaman 3, jawab soalan-soalan yang berikut dengan menggunakan ayat kamu sendiri. Kemudian, tulis jawapan kamu di dalam Kertas Jawapan yang disediakan.

- 6 Mengapakah fenomena media sosial sudah tidak dapat ditolak lagi? (6 markah)
- 7 Bagaimanakah peranan media arus perdana kini mampu diisi oleh media sosial? (6 markah)
- 8 Sejauh manakah media arus perdana mempunyai kelebihan berbanding media sosial? (6 markah)
- 9 “..... amat sukar untuk mengatakan media sosial tergelincir daripada melaksanakan tanggungjawabnya.” Berikan komen kamu. (6 markah)
- 10 Berikan maksud perkataan berikut menurut penggunaannya dalam teks. (6 markah)
 - (a) kabur
 - (b) mengundang
 - (c) tergelincir

BAHAGIAN C (30 markah)

SUMBER A

Arahan : Baca blog di bawah ini dengan teliti.

Kepentingan Pemeliharaan dan Pemuliharaan Alam Sekitar

Oleh Cikgu Zamrud

Pemuliharaan terhadap alam sekitar adalah amat penting untuk mengelakkan kepupusan flora dan fauna. Alam sekitar merupakan tempat tinggal bagi flora dan fauna. Kedua-duanya memainkan peranan dalam mengekalkan alam semula jadi dan setiap satunya mempunyai rantai yang mengikat antara satu sama lain. Flora fauna merupakan biodiversiti yang tidak boleh dipisahkan kerana flora merupakan tempat perlindungan pelbagai fauna daripada ancaman manusia atau sesama haiwan sendiri. Kepupusan salah satu daripadanya akan menjejaskan kitaran alam semulajadi. Penebangan hutan yang tidak dirancang akan menyebabkan cuaca menjadi panas dan kering lalu menjejaskan pertumbuhan flora dan fauna dan habitatnya.

Selain itu, pemeliharaan dan pemuliharaan alam sekitar amat penting agar manusia mendapat sumber air yang bersih dan tidak tercemar. Pencemaran air seperti membuang sampah dan sisa toksik ke dalam sungai akan memberikan kesan buruk kepada kehidupan manusia kerana penggunaan yang tercemar boleh menyebabkan penyakit yang memudaratkan. Hutan yang terpelihara flora dan faunanya dapat berfungsi sebagai kawasan tadahan hujan lantas dapat menakung air hujan secara semula jadi dalam kuantiti yang besar lalu dapat disalurkan dengan baik ke sungai untuk meneruskan peredaran air. Oleh itu, kita perlu menjaga kebersihan sungai agar sumber air yang kita perolehi selamat untuk digunakan dan hidupan air juga akan terus hidup.

SUMBER B

Arahan : Baca petikan karangan di bawah ini dengan teliti.

Peranan Masyarakat Dalam Menyelamatkan Alam Sekitar

Oleh Rosmidzatul Azila binti Mat Yamin

Kuasa untuk menyelamatkan alam sekitar sebenarnya terletak di tangan kita sendiri. Bila-bila masa sahaja kita boleh katakan 'tidak' kepada pembasmian hutan dan juga persekitaran yang kotor. Sebagai contoh, kita mempunyai kuasa untuk mendesak para pemaju hartanah dan penjaja supaya mereka lebih 'mesra alam' dalam menjalankan kerja mereka.

Bagi memastikan persekitaran kita selamat untuk didiami, orang awam perlu mengambil berat dan memberi perhatian terhadap kebersihan di dalam dan juga di luar rumah mereka terlebih dahulu. Sikap terpuji menjaga kebersihan alam sekitar perlu berakar umbi dari rumah. Setiap anggota masyarakat perlu mempunyai kesedaran yang tinggi dalam menjaga kebersihan, misalnya tidak sesuka hati membuang sampah ke dalam longkang dan sistem perparitan, kerana ia akan menyebabkan sistem saliran tersumbat dan akhirnya akan membawa kepada masalah-masalah lain seperti berlakunya banjir dan sebagainya.

Kewajipan menjaga kebersihan alam sekitar terletak sepenuhnya di tangan kita. Sudah tiba masanya setiap anggota masyarakat membuang sikap 'tak apa' dalam diri masing-masing untuk melindungi dunia daripada melakukan pemusnahan terhadap alam sekitar secara berterusan. Ia merupakan tugas dan kewajipan akhlak kita di muka bumi ini untuk memelihara alam sekitar sebagaimana ia telah memberi pelbagai manfaat kepada kita berabad lamanya.

Arahan : Berdasarkan Sumber A dan Sumber B, jawab soalan-soalan yang berikut dengan menggunakan ayat kamu sendiri. Kemudian, tulis jawapan kamu di dalam Kertas Jawapan yang disediakan.

- 11 Berdasarkan Sumber A, jelaskan kepentingan memulihara alam sekitar.
(4 markah)
- 12 Berdasarkan Sumber B, bagaimanakah setiap anggota masyarakat dapat memainkan peranan dalam memelihara alam sekitar?
(4 markah)
- 13 Bagaimanakah kandungan petikan Sumber A dan Sumber B saling menyokong?
(7 markah)
- 14 Berikan komen kamu terhadap pernyataan “Kewajipan menjaga kebersihan alam sekitar terletak sepenuhnya di tangan kita”. Jawapan kamu tidak harus melebihi 160 patah perkataan.
(15 markah)

Selesai

JAWAPAN CADANGAN

BAHAGIAN A (5 markah)

- 1) tegar
- 2) ditanam/disemai/dipupuk
- 3) padu
- 4) mewujudkan/menghidupkan
- 5) emosi/perasaan

BAHAGIAN B (30 markah)

- 6 Mengapakah fenomena media sosial sudah tidak dapat ditolak lagi? (6 markah)

Isi Utama	Fenomena media sosial sudah tidak dapat ditolak lagi kerana sudah menjadi revolusi dunia komunikasi walaupun kita menyedari kesan baik dan buruknya
Isi Sampingan	revolusi teknologi komunikasi semakin canggih dan penggunaan media sosial semakin pesat dan maju
Isi Utamakerana semua maklumat berada di hujung jari melalui telefon pintar yang dimiliki kebanyakan orang.
Isi Sampingan	manusia pula sudah menjadi lebih terbuka disebabkan penyebaran maklumat tanpa batasan ini.

- 7 Bagaimanakah peranan media arus perdana kini mampu diisi oleh media sosial? (6 markah)

Isi Utama	Media sosial dapat memberi maklumat yang boleh diyakini melalui portal berita atau blog kerana media arus perdana dianggap tidak memenuhi peranan itu dengan sempurna disebabkan penapisan maklumatnya.
Isi Sampingan	syarikat media cetak atau elektronik menyiarkan maklumat terpilih sahaja lalu para pengguna menjadikan media sosial sebagai saluran alternatif akibat rasa tidak puas hati terhadap media arus perdana.
Isi Utama	Media sosial memainkan peranan sebagai forum yang mampu memberi pengguna ruang meluahkan pandangan malah mereka lebih bebas menyuarakan dengan sepuas hati di ruangan interaktif seperti facebook, whatsapp, twitter, instagram, blog ataupun portal berita.
Isi Sampingan	Keterbatasan ruang dan proses penyuntingan rapi terhadap maklumat seringkali menyebabkan pandangan masyarakat tidak tersiar dalam media arus perdana lantas peranannya sebagai forum dianggap tidak sempurna. ATAU Pandangan yang dianggap bertentangan dengan dasar pemerintah atau maklumat yang dianggap sensitif langsung tidak disiarkan lantas membataskan peranan media arus perdana sepenuhnya.

8 Sejauh manakah media arus perdana mempunyai kelebihan berbanding media sosial?

(6 markah)

Isi Utama	Media arus perdana boleh dipercayai kerana mengamalkan etika tertentu manakala dalam media sosial, soal etika tidak begitu diberi perhatian.
Isi Sampingan	media arus perdana menyiarkan maklumat yang telah diperiksa kesahihannya sementara media sosial lebih mengutamakan berita sensasi untuk menarik perhatian umum
Isi Utama	Media arus perdana dapat menenteramkan keadaan kerana keras mempertahankan prinsip bertanggungjawab kepada pihak berkuasa dan masyarakat sementara media sosial pula menyerahkan prinsip itu kepada pengguna secara peribadi.
Isi Sampingan	Maka itu, berita daripada media arus perdana dapat mengelakkan kestabilan politik dan memelihara ketenteraman awam/pengguna sosial perlu bijak menilai sendiri

9 “..... amat sukar untuk mengatakan media sosial tergelincir daripada melaksanakan tanggungjawabnya.” Berikan komen kamu.

(6 markah)

Isi Utama	Media sosial boleh diterima tidak tergelincir menjalankan tanggungjawab kerana ia dapat menjadi pemerhati yang mampu membuat pendedahan terhadap pihak berkuasa
Isi Sampingan	supaya mereka dapat mengambil tindakan untuk memperbaiki keadaan.
Isi Utama	Media sosial juga boleh dianggap menjalankan tanggungjawab mereka apabila ia dapat memaklumkan kelemahan dan penyelewengan yang berlaku
Isi Sampingan	khususnya di sesebuah jabatan, agensi atau kementerian
Isi Utama	Media sosial boleh diterima tidak tergelincir menjalankan tanggungjawab hanya jika sebahagian kecil penggunaanya bijak membuat penilaian dalam menjadi pemerhati
Isi Sampingan	dan menyebarkan maklumat yang benar-benar sahih dan wajar

10 Berikan maksud perkataan berikut menurut penggunaannya dalam teks.

(6 markah)

- (a) kabur - tidak jelas/kurang jelas/samar-samar
- (b) mengundang - menjemput/menyebabkan/mendatangkan
- (c) tergelincir - tergeluncur/tersalah

BAHAGIAN C (30 markah)

- 11 Berdasarkan Sumber A, jelaskan kepentingan memulihara alam sekitar. (4 markah)
- i) Pemuliharaan alam sekitar adalah amat penting untuk mengelakkan kepupusan flora dan fauna kerana kedua-duanya memainkan peranan dalam mengekalkan alam semula jadi dan setiap satunya mempunyai rantaian yang mengikat antara satu sama lain.
 - ii) Pemuliharaan alam sekitar amat penting agar manusia mendapat sumber air yang bersih dan tidak tercemar. Pencemaran air seperti membuang sampah dan sisa toksik ke dalam sungai akan memberikan kesan buruk kepada kehidupan manusia kerana penggunaan air yang tercemar boleh menyebabkan penyakit yang memudaratkan.
- 12 Berdasarkan Sumber B, huraikan peranan setiap anggota masyarakat dalam pemeliharaan alam sekitar. (4 markah)
- i) Anggota masyarakat boleh membantah pembasmian hutan dan persekitaran kotor dengan mendesak para pemaju hartanah dan penjaja supaya menjadi lebih mesra alam dalam menjalankan kerja mereka.
 - ii) Anggota masyarakat juga boleh menjaga alam sekitar dengan tidak membuang sampah sesuka hati ke dalam longkang atau sistem perparitan kerana boleh menyebabkan saliran tersumbat lalu menimbulkanpelbagai masalah seperti banjir dan sebagainya.
- 13 Bagaimanakah kandungan petikan Sumber A dan Sumber B saling menyokong? (7 markah)
- i) Sumber A mengetengahkan kepentingan memulihara dan memelihara alam sekitar, khususnya flora dan fauna/ kesan yang mungkin timbul jika alam tidak dipedulikan. Seiringan dengan itu, Sumber B menyokong dengan menjelaskan peranan yang boleh dilaksanakan oleh individu dalam memastikan bahawa kawasan hutan tidak dimusnahkan untuk memberi laluan kepada pembangunan. Anggota masyarakat dapat menolak pembangunan oleh pemaju hartanah dengan mendesak pemerintah melalui pelbagai cara.
 - ii) Sumber A juga menonjolkan kepentingan memelihara sumber air - laut dan sungai supaya tidak tercemar kerana ia boleh memudaratkan manusia jika mereka menggunakan air yang tercemar. Sejajar itu, sumber B menyokong dengan menganjurkan agar manusia harus memulakan langkah awal mengamalkan tabiat menjaga kawasan persekitaran dan tidak membuang sampah di sistem perparitan dan longkang, tempat air mengalir kerana boleh menyebabkan longkang tersumbat dan banjir berlaku atau sebagainya.
 - iii) Sumber A dan Sumber B saling menyokong dari segi peranan masyarakat dan tanggungjawab manusia terhadap alam sekitar. Sumber A mengetengahkan perspektif dari sudut makro iaitu menyelamatkan flora dan fauna di alam sekitar sementara Sumber B menonjolkan perspektif mikro mengenai peranan setiap individu dalam masyarakat. Sumber B mengusulkan kesedaran yang dalam diri individu penting kerana kebersihan alam bermula di sekitar rumah.

- 14 Berikan komen kamu terhadap pernyataan “Kewajipan menjaga kebersihan alam sekitar terletak sepenuhnya di tangan kita.” Jawapan kamu tidak harus melebihi 160 patah perkataan. (15 markah)

- i) Kewajipan menjaga alam sekitar terletak di bahu setiap orang - bukan sepenuhnya di bahu individu tetapi pihak-pihak tertentu mesti bekerjasama seperti pemerintah, syarikat-syarikat pengeluar dan pertubuhan-pertubuhan berkepentingan.

Sebagai individu – menjaga persekitaran tempat tinggal dengan memastikan sampah sarap dibuang di tong-tong dan saluran yang sudah disediakan, dapat menjamin persekitaran bersih/ mengelakkan pembaziran barang-barang yang boleh dikitar seperti plastik dan kertas.

Contoh – tong kitar semula kini diletakkan di setiap blok, penghuni flat harus meletakkan barang-barang untuk dikitar ke dalam tong-tong biru tersedia.

- ii) Bagi pemerintah – harus menyokong usaha memulihara alam sekitar dengan melaksanakan undang-undang dan perancangan tertentu, khususnya memastikan tempat-tempat yang kaya dengan biodiversiti dikekalkan/ tempat tinggal hidupan ini tidak pupus/keseimbangan alam sekitar dapat mengelakkan berlakunya bencana alam.

Contohnya, pemuliharaan Chek Jawa telah akhirnya disokong oleh pemerintah setelah pertubuhan setempat membuat usulan dan kajian.

- iii) Syarikat-syarikat pengeluar harus bertanggungjawab dan membuang sisa-sisa toksik di tempat-tempat yang selamat supaya tidak memudaratkan manusia dan hidupan di sungai atau di laut. Contohnya, pernah berlaku pencemaran di Lautan Atlantik oleh Exxon Mobil, kesan – menjejaskan hidupan di laut dan menyebabkan penduduk di kawasan tempat minyak tumpah berbalah. (boleh berikan contoh-contoh lain yang berkaitan)

Kesimpulannya, kewajipan memelihara alam sekitar terletak di bahu setiap manusia di bumi ini, baik individu mahupun pihak-pihak berkepentingan dan pemerintah.